

Su'esu'ega i Tomai ma Iloa Fa'aleaganu'u mo le Atina'e o Agava'a mo Suiga o le Tau i le Pasefika

E lua fa'amoemoega autu o lenei su'esu'ega: muamua (1) ia aoina ni fa'amatalaga e fa'atatau i le fa'aaogaina o tomai ma iloa fa'aleaganu'u i le atina'e o agava'a mo suiga o le tau ma lona (2) ia saili pe talafeagai ona fefa'asoa'i le fa'aaogaina ma le puipuiga o nei tomai ma iloa fa'aleaganu'u e ala i ni mafutaga fa'alea'oa'oga a i latou i atunu'u o le Pasefika o lo'o fa'afaillelea nei measina fa'aleaganu'u taua.

Ua tu'uina atu i lalo se aotelega o iuga o le lipoti o lenei su'esu'ega. Mo nisi fa'amatalaga e mafai ona maua mai le upega o feso'ota'iga fa'ainitaneti lenei: sharingknowledge.net.au

1) O le Pasefika ua aofia ai ni atumotu e tusa ma le 25,000 o lo'o i le loaloa o le ogasami aupito i tele lenei o le lalolagi, ma o nofoaga o lo'o aumau ai le silia i le 9.5 miliona o tagata soifua. E tele ni su'esu'ega ua faia i tu ma aganu'u a tagatanu'u o lenei nofoaga o le lalolagi i le tele o tausaga ua mavae, peita'i o lea fa'atoa amata ni su'esu'ega tonu i agava'a o nei tu ma agaifanua i le fa'amalamalamaina o mafua'aga ma a'afiaga o suiga o le tau i le taimi nei. O lo'o iai ni fa'amaumauga taua o ni molimau ua fa'amaonia ai le taua o nei tomai ma iloa pe a fa'alauteleina, i le a'oa'oina o agava'a o tagata ma fa'aalapotopotoga o le Pasefika e tali atu i a'afiaga o suiga o le tau. E fai ma fa'ata'ita'iga o Kiripasi, e lua ni fonotaga i fuafuaga e tali atu i suiga o le tau sa auai ta'ita'i fa'aleaganu'u, sui o malo, tama'ita'i ma tupulaga talavou mai atumotu eseese ole atunu'u na fa'atoa o latou iloa lelei ai, e ui ina eseese o latou motu ae o lo'o tutusa pau le a'afia fa'atasi o i latou uma i tulaga eseese o suiga o le tau.

E ui i le taua tele o tomai ma iloa fa'aleaganu'u i taumafaiga e atia'e agava'a e tali atu ai i suiga o le tau, peita'i e leai se matagaluega fa'alemalo, po'o se fa'alapotopotoga tuma'oti o avea ma ana manulauti autu le fa'amaopopoga ma le fa'alauteleaga o nei puna'oa taua o le atamai ina ia lagolagoina ai taumafaiga a fa'alapotopotoga nu'u o le Pasefika o lo'o tele ina va'aia ma ta'ita'ia e pulega fa'aleaganu'u. O a'afiaga o suiga o le tau ua a'afia ai so'o se itu o le soifuaga o tagata o le Pasefika, o latou si'osi'omaga ma tamaoiga fa'alenua, atina'e o tamaoa'iga, soifua maloloina ma so'otaga fa'alesoifuaga lautele. O nei a'afiaga, o lo'o lualuagia fa'atasi ma isi malosiga o suiga i le lalolagi i ni fa'afitauli ogaoga o lo'o lamatia ai nei le solosolo manuia o tamaoa'iga, tu ma aganu'u o tagatanu'u moni o le Pasefika.

A fa'aaauu pea ni a'afiaga to'atuga o nei suiga, e ono mo'omia i le lumana'i ona fesi'ita'i nofoaga e aumau ai tagata o le Pasefika, e pei o le si'i atu o i latou o alala i atumotu ma talafatai maualalalo i nofoaga ma atumotu maualuluga e le lofia i le si'itia o le suatai. O nisi o motu laiti o Papua Niu Kini ma motu o Tuvalu, Kiripasi ma le Atu Malesala e ono vave ona faia iai lenei fuafuaga ona o le maualalalo o nei atu motu. O lo'o fa'asolo nei ona fesi'ita'i nofoaga o tagata i totonu o o latou lava atunu'u, e pei ona vaaia i Vanuatu, Kiripasi ma Tuvalu. O atumotu o Kiripasi o lo'o nofoia e le lata i le 97,000 tagata e na o le lua mita le maualuga o o latou laueleele mai sami. I le fa'amanatuga o le Aso o le Si'osi'omaga o le Lalolagi ia Luni o le tausaga nei, sa tatalo atu ai le Palemia o Kiripasi ia Niu Sila ma Ausetalia mo se fesoasoani i ni nofoaga i o latou eleele, e ono si'i atu iai tagata o lona atunu'u, ona ua latou talitonu maumaututu, e ono ufitia atoa o latou laueleele e le sami i le isi 50 i le 60 tausaga o i luma.

E itiiti ni fa'amaumauga maumaututu o iai nei o tomai ma iloa fa'aleaganu'u o tagata o le Pasefika i le tau, laau ma manu, ma e mo'omia ai le faia o ni su'esu'ega mae'ae'a ina ia fa'amaninoina tulaga o iai nei ia puna'oa o le atamai, ma lo latou taua i le taimi nei. O lea le fa'amoemoe ua amata ai e le Fa'alapotopotoga o Su'esu'ega i Vai ma le Vateatea a Niu Sila se su'esu'ega i tomai ma iloa o lo'o fa'aaoga e tagata Maori ma tagata Samoa e fa'amalamalamaina ai va'aiga ma suiga o le tau. O lenei galuega ua talafeagai fo'i ma manatu autu na fa'aalia i le tele o mafutaga fa'alea'oa'oga ma koneferenisi i mataupu tau i suiga o le tau sa faia i le sefulu tausaga talu ai. E ui ina fa'aalia i nei mafutaga le taua o su'esu'ega fa'asaienisi mai le Atu Sisifo o le lalolagi i va'aiga ma suiga o le tau, peita'i ua fa'amamafaina ai fo'i le taua tele o tomai ma iloa

fa'aleaganu'u i fuafuaga e tali atu ai i a'afiaga o le tau, pe a mafai ona fa'amaopopoina lelei nei puna'oa taua o le atamai.

Ua mautu le talitonuga o tagata o le Pasefika, o le tau o lo'o fa'asolosolo pea ona suia, ma o le a a'afia ai tele le solosolo manuia o o latou soifuaga ma atina'e o o latou tamaoa'iga. E pei ona latou molimauina i le maualuluga atu o au o le sami i aso nei na i lo aso ua mavae; le fa'ateleina o afa ma lo latou malolosi e faitau miliona tupe e toe fa'aleleia ai nofoaga ua fa'aleagaina ai; le aia ma le tafia pea o le talafatai o o latou atumotu; le fa'ateleina o la mala o lo'o afaina ai atina'e o fa'atoaga; le luagia o vai magalo i le suasami; le mamate o amu ma aau, ma le fa'ateleina o fa'ama'i mai suavai le mama.

O nisi nei o fa'ata'ita'iga o fuafuaga o lo'o mafai ona fa'aaoga iai tomai ma iloa fa'aleaganu'u i le taimi nei:

- Metotia fa'afa'atoaga e puipuia ai nofoaga e pu'e ai le suavai ma fa'ateleina ai le totoina o taumafa eseese;
- Suiga o nofoaga ma fesuiaiga o le fesi'ita'iga o fa'ato'aga ma atina'e fua i suiga ma va'aiga o le tau;
- Fesuia'iga o taimi o tuliga o manu ma le aoina o laau taua fua i vaitau eseese o le ola o vaomatua ma meaola o iai;
- Fesuia'iga o ituaiga laau ma manu e fa'aaoga i fa'atoaga ma lafumanu fua i tulaga ma fa'afitauli fa'alesi'osi'omaga;
- Fesui'aiga o auala ma metotia e teu ai ta'umafa fua i suiga ma va'aiga o le tau.

O le Polokalame o Fuafuaga a le Pasefika e Tali Atu ai i Suiga o le Tau le PACC o se poloketi ua fa'atupeina e le Teugatupe Fa'avaomalo mo le Si'osi'omaga le GEF ma le Matagaluega o Atina'e a Malo Fa'atasi le UNDP, o lo'o aofia ai Malo Atumotu e 13 o le Pasefika, ma o lo'o va'aia lea poloketi e le Failautusi o le Polokalame mo Si'osi'omaga o le Psefiak. O le sini autu o lenei poloketi ia si'itia agava'a ma tomai o atunu'u o lo'o auai e tali atu i a'afiaga o le tau. O lo'o tapena le amataga o le fa'atinoga o lenei poloketi i se fonotaga i le tausaga nei 2008. E iai ni avanoa i lenei poloketi e fa'aleleia ai tomai ma iloa fa'aleaganu'u i ona vaega autu e tolu – fa'amautuina o ta'umafa, vaaia lelei o nofoaga tu lata i le sami, ma le puleaina lelei o nofoaga e pueina ma maua ai le suavai.

2) E toetiti lava o tagata uma na fesiligia i lenei mataupu na latou ioeina le taua tele o le faia o se fonotaga fa'apitoa fa'avaomalo e talanoaina ai le puipuiga ma le fa'alautelega o tomai ma iloa fa'aleaganu'u ma lo latou aoga i mataupu tau suiga o le tau, aemaise lava i le fa'amaopopoina o ni fa'alapotopotoga e mafai ona latou va'aia ma puleaina lelei o latou si'osi'omaga ma mataupu e a'afia ai e pei ona fa'aalia i luga. E ui i lea e le o mautinoa i le taimi nei po'o fea ma po'o afea e fai ai lea mafutaga taua fa'avaomalo. Peita'i e ono talafeagai ona tapena se fa'amoemoega fa'apenei e faia i le vaitaimi o le tauaofiaga o le Fonotaga Fa'apa'aga mo Suiga o le Tau o lo'o tapenaina nei e le SPREP ia faia i Samoa i le fa'aiuga o Oketopa o le tausaga nei 2008.